

# Mien Horoskop up dat Johr 2010

**Naug Geld inne Knippen / In 'n Sömmer wat ruhiger wern / Off dat wücklick aals so kummp?**

Van Alfred Kuhlmann ut Ellenste

Na, häss Du all dien Horoskop för dat neie Johr läst? Nä? Also ick häbb mi dat lessdaogs eis ankäken, un wör platt, wat so 'n Horoskop aals äöwer mi – Sterneiken „Waoge“ – weit. Dat jüst anfang'ne Johr schall för mi hellerbest loopen, dat sägget tauminnt dei Sterns (= Sterne). Ick schall dat ganze Johr äöwer naug Geld inne Knippen hebben – so staiht dat in mien Horoskop. Un wenn dat mit dat Geld eis wat weniger wedd, dann schall ick mi bi ännersein'n 'n Raot haolen. Wanneiher (= vielleicht) bi dei groten Banken, wat? Dat vergät man ganz drocke.

Mit dei Gesundheit schall dat bi mi in 2010 uck gaut utseihn – sägg mien Horoskop. Un wenn ick maol 'ne lüttke Grippe häbb, kaom ick ruckzuck weller uppe Beine. Dorför schull ick aower väl Sport maoken un 'n poor Pünne loswern. Affnahmen. So ein Horoskop maokt sick dat jo einfach. Wecker schall denn nu dei ganzen Schlickersaoken äten, dei dor noch van Wiehnachten un Neijohr in 't Schapp ligget? Un wat weniger schmöken schull ick uck noch, dorbi rook ick doch gor nich.

Aower nu: In 'n Fröhjohr waokt dei Kunstmaoler in mi up. Dat haut mi glatt ümme. Ick schall tau dei Tied väl basteln un maolen. Dat sägget dei Sterns. Ick maolen? Wenn ick blots 'n Pinsel mit Farwe seih, dann rettket (= zittert) all miene rechte Hand. Dat ligg wisse an 't Öller. Un in 'n Sömmer schall ick dat wat sinniger angaohn laoten. Dat mott nich aals hundertperzentig (= hundertprozentig) wän, nä, uck bi 'e Arbeit nich – mennt mien Horoskop. Dat giff 't jo woll nich! Glöwt so 'n dusseliget Horoskop, dat man uck Geld verdeint, wenn man dei Hannen inne Taschken stäken dait? Dor packs di jo mit beide Hannen an 'n Kopp.

Taun Harwste kaom ick weller inne Jungmäöhlen – dat sägg tauminnt mien Horoskop. Ick schall aower dei Fingers vanne ännern Fraulüe laoten un uppassen, dat ick kien'n Spektaokel mit miene bäteren Hälfte krieg. Dor schall mien Menschke woll all nao kieken!

Jungedi! Dat maokt gaue Luune för 2010. Off dat aower uck wücklick aals so kaomen dait? Dat weit ick in ein Johr – dat sägg mi nich mien Horoskop, dat sägge ick.